

**IN KHARKHIP LOVIN, THINLUNG INHAWNG IN
INNGAIHSAKNA CHUNGCHANG BIBLE ATANGA HAICHHUAH**
(Open Doors, Open Hearts. Exploring biblical hospitality)

Thilthlawnppek a ni a, thupek a ni baw a, Chanchin tha tarlanna leh lanchhuahtirna a ni.

Khualchhawn hna hian Biak in a inkhawm tur lo kal te lo dawnawm leh inkhawm ban hnu a ei leh in lama lo duhsak chauh hi a mawhpurhna a ni hran lo va. Thlarau lam thilthlawnppek a nihzia hrechiantu te chanpual a ni.

Inngaihsakna kawnga huang zauh turin hetiang hian koh kan ni.

Pathian thu atanga kan thlir chuan inngaihsakna hi thiltih leh hmangaihna a lanchhuahtir a ni a. Pathian fa ni tura mi te tan theitawp chhuaha kan beih hram hramna hi a ni. Kharkhip loh, thinlung inhawnga kan dawnawmna hian an nihna ang anga Pathian an hnaih theihnan a ti ngampa in a ti tlangnel thin a. Chu chuan Krista ke bul hruai thlen an nih nan leh Pathian ruatsak kawng hmufiah turin nasa takin a tanpui baw a ni.

Krista zuitu kan nih chuan kan hmelhriat leh hmelhriat loh lam ni lovin, kan ngainat leh ngainat loh zawng te pawh sawi lovin Krista hnen hruai thlen hi kan mawhpurhna a ni.

Bible atanga inngaihsakna chungchang zirlai pariat te hi kan nun inenlet nan leh ataka nun chhuahpui turin ngun taka zir turin ka sawm tak meuh meuh che u a ni.

Heng zirlai te hi chhiarchhuak ringawt lovin ngaituah zui ila. Inenlet na tur atana zawhna te hi kan nun hruaitu atan tangkai takin i hmang ang u.

Tawngtai chungin mahni nun theuh bihchiang ila, Pathian hnen ata thil thar i beisei theuh ang u.

DAY - 1

KEHCHHIATNA Disruption

Luka 13: 10-17

Hmeichhe pakhat kum sawm leh kum riat teh meuh ramhuai man, ding ngil thei tawh lo, kun reng mai chu Chawlhni ah inkhawm turin a rawn kal a. A pianhmang leh a mitmeng dul raih atang ringawt pawhin hmabak beiseina amahah hmuh tur a awm lo a ni. Ramhuai man a nih avangin vantlang ngaihah misual a chhiar a ni a. Chutiang a ni chungin inkhawm turin a kal a, a rinna leh a Pathian a phatsan lo.

Lal Isuan a hmuhin a hawisan lo va, amah ngaihsakin a bia a ni.

Ngaihsak la, be rawh :

Kum 18 chhung zawng kha hri hlauhawm ang maiin mi te hlauh rawn a hlawh a. Khawih chu sawi loh en tak ngial pawh an en duh lo. Mahse, Lal Isuan a hmuhin a ngaihsak a, a bia a, a chungah kut ngathin a tidam ta a. A taksa in ngai a lo awm leh ta a ni.

Lal Isuan Abrahama fanu ti a anihna a sawilan hian zahawmna leh chawimawina a keng tel a. Midang te tan hian a thinurthlak ngawtin a rinawm a ni.

Chawlhni a hetiang taka midangte ngaihsakna hi sakhaw mite lawm zawng a ni hauh lo tih a lang reng mai a. Amaherawhchu, thuziak leh dan te hmangaihna leh ngaihsakna hian a dodal in a kalh tlat a ni.

Hmeichhe ding ngil thei tawh lo kun reng mai hnena danglamna lo thleng ta te, sira hnawh hnu in Biakin lailum a lo thleng te leh lawm avanga a lam hial mai te hi kan mitthla thiam hlawm ngei ang.

Kehchhia ten tuam dam an mamawh.

Hmangaih ngailoh hmangaih leh daikil kar ami dawmkan te, dikna leh zahawmna chang tura Pathian anchhung hruai thlen te hi kan ngaihsak dan tur dik tak a ni. Hetiang a nih hian mite kan ngaihsakna in danglamna nasa tak a thlen theih zia a ti lang Chiang a ni. Mite nunah danglamna a thlen a, beiseina eng an tan kan chhawpchuahsak bawh a ni.

Mahni inenletna :

Hetieng harsatna tuar mek, nun kehchhia kan awm em le? Kan hriatthiamna mamawh em em, kan kawm hlim mamawh, biak lumlam ngai, kan dawnsawn mamawh tak an awm em? Chhan hrang hrang avanga kehchhe vek tawh te Lal Isua hnen an thlen theih lohna tura daltu eng nge awm le?

Kan tawngtai sakna tur.

Lalpa, heng nun kehchhia te hmufiah thei tur hian kan mit min tih mensak la; chakna thar an neih theih nan anmahni ngaihsak a tuamhlawm thei turin min pui ang che.

Colonel Donna Evans.

DAY-2

MIDANGTE NGAIHNATHIAMNA Consideration of the others

Mi dangte ngaihnathiamna

Genesis 18:6-8

Luke 10:30-37

Isaiah 58:7

Galatians 6:10

Matthew 10:40-42

Luke 14:12-14

1 Peter 4:9

Mikhual te chung a that chhuah hi kan mihringpuite chung a ngilneihna kan lantirna leh mihring taksa pua Pathian kan lo mikhualna, midangte hnena hmangaihna lantirna a ni. Mihring te hi Pathian anpui leh mamawh neia siam kan ni. Chuvangin, midangte chanchin leh tawnhriat te hi zahngai tak leh inhawng taka kan lo dawnawh chuan an mamawh hrethiam turin kan lo chak deuh deuh ang.

Mikhualte hi hah tak, riltam tak leh a chang chuan hliam tuar te pawhin an lo tlu lut thei a ni. Eitur lo pek a, chawlh hahdamna lo ngaihtuahsak hi kan tihtur a ni. Genesis 18 a hriat ngai loh khual Abraham a lo thlen dan kan hmu a, Luka bung 10-a Lal Isuan a zirtirte hnena Samari Mitha tehkhin thu a sawi te pawh kan hria a ni. Midangte lo dawnawh leh an mamawh ngaihsak hi Pathian thupek a ni a, Lal Isua ngei pawhin a zirtir hmasate hnena a zirtir kha a ni bawh a ni (Matthaia 10:40-42).

Mikhualte leh midangte hnena that chhuah hi a taka tihhlawhtlin awlai lo tak a ni a. Mahse, Isua hnungzuitute kan nih angin, harsatna karah pawh kan beih zel a pawimawh. Min tina tu leh min ti lungawilo tu te chung a that chhuah te pawh hi a chang chuan a harsa hle bawh a. Chungtiang harsat hun a lo thlen pawhin Pathian tanpuina kan dil thei a, kan harsatna leh tanpui theihlohna te chu zahngaihna leh khawngaihna min thlak thleng sak thei a ni.

Midangte chung a thatna kan lantir hian phunnawi lova midangte tana kan thinlung hawng thei turin min zirtir a, a let leh tur ngaihtuah lova ei leh in, khawsakna siamsak leh an thu leh hlate ngaihthlak sak thei turin theihna min pe zel a ni.

Ngaihsakna leh thatna kan pek chhuah tlem hian, keimahnia Pathian lawmna kan ti tlem a ni.

In enletna :

Phut let nei lova midangte tanpui a ngaihsak tur hian engtiang chiahin nge ka thinlung a in hawn?

Tawngtaina :

Hmangaihnaa khat Lalpa, tun hun leh hun lo awm lehzel turah, ka nuna midangte senglut thei turin i hmangaihna min tihharh ang che. Amen

Major Lousie Mavouna and Commissioner Jane Paone

DAY-3 PAWMNA

Acceptance

Hebrai 13:2
Genesis 18:1-8
Luka 10:25-37

Ringtu nunah mikhualte chungah that chhuahna hi chetzia a ngilneihna lantir mai piah lam thil; an hun kal tawh chanchin emaw, rindan emaw, dinhmun emaw thliar hauh lova midangte chu an nih anga lo pawmna tur atan thil buaipui, pawimawh tak a ni. He pawmna kan tih hian kan bula mi chu a chanchin kan hriat tam leh tlemah a inngnat lem lo.

Mikhualte chungah that chhuahna chungchang zirtirna lar tak pakhat chu Thuthlung Thar bu Hebrai ziaakah kan hmu a: “Mikhualte chungah hmangaih chhuah theihngihl suh u; chutiang tiin thenkhatten hre lovin vantirhkohte an thleng si a”(Hebrai 13:2). He zirtirna thu hi chhan tha tak nei a ni.

Genesis bung 18-ah chuan, mikhual pathumte chungah that chhuahna Abrahama'n inngaitlawm leh thilphal tak maia a lantir thu kan chhiar a. Upat tawh lamah khawsa thei tak ni chungin, rawn hrilh lawk lem lova rawn tlawhtu mi pathumte chu, a duh chuan a chhiahhlawh tam tak zinga mi pakhat chu kovin lo ngaihsak/vil turin a tir thei reng a. Chutiang ni mahse, amah ngei thawk chhuakin a neih zinga tha ber ber chu Abrahama chuan phal takin a lo hlui a ni. Heng mikhual te chanchin hi hriat loh tam tak kan nei a ni. Abrahama leh Sari te nupa pawh khan tutenge an nih an hre bik lo. Nimahsela an lo ngaihsak dan kha mi dangte Pawmna lantirna pawimawh tak a ni. Pathian leh vantirhkohe pahni an lo mikhual reng a ni tih alo lang chhuak nghe nghe anih kha.

Mikhual tunge anih pawh hriat ngai loh kan lo lawm hian, tum reng vang pawh nilovin kan zingah van lam mi telvena remchang kan lo siam sak reng a lo ni thei - a makin awih a harsa zawk hial ang chu..

Luka bung 10-ah Samari mi tha chanchin kan hmu a. He thawnthuah hian Samari miin mahni mihringpui chungah thatna - hmelhriat ngai loh mikhual hlaim tuar chungah ngaihsakna a lantir hian - hnam hrang leh sakhaw hrang hrang kar a inlung bikna/indaidanna bang chu thiatin a rawn khum vek a ni tih chipchiar takin min hrilh a ni.

Samari mi tha khan mikhual hlaim tuar mek hnena hmangaihna a lantir dawn lai khan, a thenawm hmelhriat a nih leh nih loh a ngaihtuah hmasa hran lova. Eng ram mi nge a nih a, a chi leh kuang, a tun dinhmun, a thianghlaim nge thianghlaim lo tih lam engmah a ngaihtuah lo. Hlaim tuar mek kha a thenawm, a vengte a ni, chu chu a pawimawh ber chu a ni.

Mi dangte ngaihsakna dik tak chuan ri kham chin a nei lovin, pawnlam mi ni a langte thleng pawha pawm duhna in a zial nghet tlat zawk thin. Pathian hmangaihna ah chuan pawnlam mi an awm lova. Mikhual te chungah thatna lantir tur leh chu thatna dawng turin thiam thil bik neih a tul hek lo.

Ngaihtuah tur:

Tumah thliar hrang bik lova mi dangte pawmna, Krista nuna kan hmuh ang ngei mikhualte ngaihsakna thlarau nun kha i chhawm nung zel em le?

Tawngtaina :

Hmelhriat ngai loh mikhualte chu an dinhmun pawmna dik tak nen an chungah khawngaihna lantir zual zel tur leh, Krista'n entwawn tur min hnutchhiah ang taka hmangaih leh lainatna nen lo lawm thin turin. Kan zingah Pathianin chu khawngaihna chu rawn thlen ngei rawh se. Amen.

Major Arif Masih

DAY-4

KHAWNGAIHNA LUANGLIAM **The flow of grace**

Luka 9:51-56
Luka 10:25-37
Johana 4:1-38

Thuthlungthar Chanchin tha bu-ah te hian Lal Isua leh Samari mi te indawr tawnna chanchin ziaak anih dan han thlir vang vang hian, a ziaktute thinlungah tawpchin nei lova tur tlattu awmin a hriat theih a ni. Nazaret khuua seilian anih avangin Isua khan an khawtlang chanchin, thenawmte nen an inkarah inpawng huatna leh inhriatthiam loh tawnna ang chi a tawng fo thin ang tih a rinhlelhawm lo hle a. Kum zabi tam tak liam ta atang tawhin Juda mi te leh Samari mi te inkarah inpuhmawh tawnna hi alo awm thin a. Hnam chi hrang kara inelna, sakhaw rindan inan lohna, leh ram rorelna dahlau tak te chuan an karah khi siamin, chu chuan tharum thawhna te pawh a thlen fo thin a ni.

Isua leh Samari mi te in biak tawnna kan thlir hian hnam chi hrang leh ze hrang hlak te indawr tawnna tiin a sawi theih ang; Samari mi te khaw pakhata an luh tum khan an lo lawm lova, zirtirte thinur pawh a kamkhat zawk hlauh va (Luka 9:51-56); a thawnthu lar berah pawh a changtu ber atan Samari mi a hmang a, midangte tan entawn tur a la ni zui bawk (Luka 10:25-37); Samari hmeichhe bulah amah chauhvah thuin, tui alo in bawk (Johana 4:1-38). Heng entirna zawng zawng lo thlirtu/hriatpuitu Juda-te tan chuan thu thinthawng leh pawm harsa tak tur a ni. Tun hunah hian Isuan eng nge helai hmunah a tih ve thung ang? tih zawhna hi keini pawhin kan inzawt tur a ni ang.

Samari mi te zinga Isua a inhnawmhnawih tlat dan hi mikhualte ngaihsakna enlenna mita kan thlir chuan, thil thleng ngai lo danglam tak kan hmu tan ngei ang. Midangte hnena a inhawn duhna hian, kalphung pangngai chin than thil te thiah vek a duhzia a tilang – ‘mi bawllhlawh’ te hnai takah a awm a, ‘pawnlam mi’ te chu dawhkan a kilpui a, ‘ringlo mi te’ zingah Pathianin hna a thawk a ni tih a pawm bawk. Chumi rah chhuah chu, hmelma te kha thenawm khawveng an lo ni ta a, hmelhriat ngai loh mikhualte chu thilthlawnppek angin an lo lang ta a, ‘midangte’ chu Pathian khawngaihna palai te an lo ni ta thin a ni.

Lal Isuan mikhualte a ngaihsak thin dan entawna hmangin, tute pawh ni sela kan thinlung chhungril ber thlengin, an tana inhawng zau turin keini hi koh kan ni e. Chutianga kan tih phawt chuan, Thlarau Thianghlim kal tlangin Pathian khawngaihna lo luan liam theihna tur atan hmun thianghlim tak lo inhawng tur chu kan beisei thei ang. Tichuan chu hmun chu nun inthlak danglamna hmun a lo ni dawn a ni.

Ngaihtuah tur:

I nunah tawp chin awm lova mikhualte ngaihsakna i lantirna khan Pathian khawngaihna lo luan tlangna hmun a siam hun lai kha i ngaihtuah chhuak thei em? Khang hun lai khan i nunah eng nge lo thleng le?

Tawngtaina :

Lalpa duhtak, mikhualte chungah thatna lantir awmzia min hmuhtir a vangin lawmthu kan hrilh che a. Kan thinlung chhungril ber thlenga midangte tan inhawng turin min pui la, chu chuan i khawngaihna luangliam lo dawng thei tur hmun a siam ngeina turin. Amen.

DAY-5

RORELNA DIK LANCHHUAHTIRNA An Act of Justice

Leveticus 19 : 33 - 34

Matthew 25 : 31 - 40

Mikhual te chungah thatna lanchhuahtirna hi Lalram felna a ni. Tu emaw tanpui ngai zawnehhuah a, an mamawh hriat saka, tanpui chakna neih te hi a kaihnawih te an ni. Heng mite hi an lo dam khawchhuah ve na tur chauh ni lovin, an thanlen zel theihna turin in leh Thlamuanna (shalom) an lo tawnhriat ve theih nan.

Nimahsela Isua Krista entawn tur kan nihna leh Pathian thupek kan zahna kawngah, he khawvela tlangtla lo te, lawm hlawh lo te hnenah hian khawtlanga pawm an nih theihna turin Pathian hmangaihna tarlang chungah ban a, kan tuamhlawm a pawimawh a , heng mite ber zinga mi pakhat chungah kan tih hi Lalpa chungah ti kan ni tih hre reng chungin (*Matthew 25: 40*). Hetah hian kan hnam tihdan phunga mikhual te chungah that chhuah tur a chawhlui lo kilpui te a ni thei - mahse hei lo pawh hi a tam ang.

Leviticus 19:33-34 ah chuan Pathianin ram dang mi, kan rama khawsa ve an awm a nih chuan tichhe lo turin min zirtir a, kan rama mi ang a cheibawl tur leh keimahni kan inhmangaih anga hmangaih ve turin min kawhmmuh a ni.

‘Chenna In’ pe turin.

Chenna In tih hi hmun a ni lo va; inkungkaihna ani.

Ram dang mi nih hi thil nuam tak a ni lova - an nunphung pangngai pawh hriat loh, eng inthumna nge an pawm tih leh an nitin khawsak phung inzirchawp leh ngai te chu thil awlai tak a ni lovang.

Isua zuitu kan nihna kawngah, kan zinga kan hmelhriat miah loh te chungah hmangaihna leh dawhtheihna kan lantir tur a ni. Pawisa chhiarna dawhkana pawisa an la belhchian hauh loh muangchanga chhiar te, tlai hlau tak chungah bag lian leh rit tak phur chungah airport security hautak tak paltlang mek te, an awmna ram tawng pawh thiam tha mang lo te chungah. Hmangaihna nen kan lo lawm tur a ni a, kan zingah chenna in kan pe tur a ni.

Hei hi Lalram felna kan lanchhuahtir dan tha ber - dik tak a nun leh thil dik lo tidikin.

Shalom hi Hebrai thumal, Juda te inlawmna a ni a, thlamuanna ti a lehlin thin niin, himna leh dikna a kawka ni. Midangte nena inzawmna tihna ani. Thilsiam te nen, Pathian nen.

Mahni inenletna

Engtiangin nge hmelhriat loh ka lo lawm ang(thenawmah, school ah, khawtlangah)?

Engtiangin nge hmelhriat loh te kaltlangin Pathian ka hnenah a in puan?

Vawiin atana tawngtaina :

Lalpa duhtak, mikhual leh ram dang mite i mit a en thei turin min pui ang che. Anni nena inkungkaihna kan siamna kawngah a hmangaihna leh dawhtheihna lantir thei turin min pui ang che.

Colonel Wendy Swan

DAY-6

MI ZAWNG ZAWNG KUAHKHAWMIN Embracing everyone

Luka 20 : 1 - 3

Salvation Army te hian khawvel hmun hrang hrangah, thingpuino dawma inkawmho hi kan chin than pawimawh tak a ni. Heng hunte hian hahdamna hunte, titihona leh inhriatchian nan hun tha min pe a. Thingpui inho tura hun kan lo inpek hian Pathian pawlna hun bik kan lo insiam tel reng a lo ni a. He Bible chang ah hian Zakaia inah Isuan chawhlui kilpui tura a sawmna kan hmu a. A thawnthu chhuizauna ah chuan, mipui thenkhat te chuan, "Engvangin Isua khan a sawm le?" tiin an zawt hial a ni. Zakaia kha mi zawng zawng thingpui no dawmpui chak a ni lo a ni.

A chang chuan rualbanlo/vohbik kan tih te hian thingpui inho pui tur nei lovin mal takin an awm thin a. Ka thiannu pakhat chuan Salvation Army rawngbawlna a lo hmelhriat hnu chuan, mite chuan zing thingpui inho turin a unaunu bula thut kha an duh ngai lo a ti a ni. A tana hlu tak a unaunu chu rualbanlohna nei a nih avangin, hriatthiam reng pawh a harsa ve fo thin a. An zing thingpui inhona ah chuan chu a unaunu chu hmaih nilo mahse - a tel ve chu lawm a hlawh vak lo nih chu. Theologian, John Swinton a chuan ti hian min lo hriattir a, "An kianga awm tura khawtlangin an duh loh kha Isuan a kiangah a awmtir a ni ," tiin.

Kan kianga awm tur kan thlan te azirin, anmahni mai nilo khawvel zau zawk hnenah amah mai bakah he khawvela a tawnhriat te pawh kan ngaihhlut sak a ni tih kan hriattir a ni. Rinawm taka mikhual te chungga that kan chhuah naah hian thingpui bel kila thuho te ah chuan Pathian anna hlimthla lantirna leh thilpek inpek tawwna an nei a ni tih pawmpui a ni. Keimahni aia danglam deuhte kianga awm tura kan thlanna hi Isuan mikhual te chungga thatna lanchhuahtir a ni.

Mahni inenletna

I hun tawn mek thlir khan, tunlai hunah tute nge Isuan thingpui no dawmpui tura a sawm ang?

Engtiangin nge in khawtlanga rualbanlote, mikhual te chungga thatna rinawm takin i lanchhuahtir ang?

Tawngtaina

Ka pa, mi kan tawh apiang te hmel atangin Pathian hlimthla hmu thei turin min pui la. Inkungkaina tha siam turin hawihhawmna piah lam thlengin mikhual te chungga thatna lantir thei turin min kaihhruai ang che. Amen

Carolie Bridle

DAY-7

THILPHALNA LANTIRNA A display of generosity

Luka 10:38-42

Africa ramah chuan mikhual te hi hriat lawk lem loh pawhin an thleng fo thin. Zimbabwean Shona thufing ah ‘mueni haapedzi dura’ tih hi a awm a, chumi awmzia chu ‘mikhual avangin in tlachham lovang’ tihna a ni. Hei hian midangte nena kan thil neih kan insem tlan te, kan hmehhriat emaw hmehhriat kher loh te laka that kan chhuahte hian engmah kan chanlo tihna a ni. Rwandese thufing chuan ‘I hriat ngai loh ten, a chi atana i zuah ve tang tang chu ei theih a siam turin an ngen che’, a lo ti bawk a. Kan neih hlu leh tha ber ber, kan hlut em em te midangte tana ui hauh lova kan pek fo chuan, chu malsawmna chu kan chungah a let leh thin a ni.

Luka 10:38-42 ah hian, Marthi leh Mari te chenna hmuna Lal Isua lo thleng kan hmu a, Africa ram khawsak phunga khual kan lo thlen thin dan te min hriatfiah tir a ni. Isua khan a zinkawngah Marthi leh Mari te chu hrilh lawk lem lovin a va thlen chilh a, tha takin an lo dawngsawng a nih kha. Chu chuan midangte chungah thatna kan lanchhuahtir hian kan theihna leh neih sa lam niloin kan lo dawngsawmna thinlung a pawimawh zawk a ni tih a tarlang. He chanchinah pawh hian, ei leh in lo buatsaihsak mai piaah lamah ngaihsakna te, thlawpna leh duhsakna te a tel a ni.

He khawvelah hian, mi dangte tana luangchhuak thei dinhmuna ding si, ti thei miahlo te hi tam tak an awm. Tin, an in tunnun na tur chauh nei a mi dangte an nuna leng ve miahlo pawh an awm bawk. Kan ei khawp bak tam tak kan nei emaw, kan daih tawh chiah kan nei a nih pawhin, midangte tana zau taka inhawng tur leh mite chungah thatchhuah tura kohte kan ni. Neih chuangliam kan neilo a nih pawhin, midangte rawngbawlsak thei tura inpeih reng turin Isuan min ko a ni. Kan remchan hunah chauh ni lovin, mamawhtu awmna apianga tanpui thei turin min duh a ni.

Mi thilphalte thiltih chu midangte hlawkna tura an thinlunga hmangaihna atanga lo chhuak a nih ang bawkin, midangte chungah thatna lantir pawh hi chhungril atanga lo chhuak a ni.

Mahni enletna :

He chanchin tawi atang hian, mi dangte chungah thatna lantir turin enginnghe tiphur che?

Mi dangte chungah that i chhuah hian, i inbuatsaihna leh inphalna te chu tawp chin neilo a ni em?

Tawngtaina : Lalpa duhtak, ka hmaah hian mamawhtu lo awm thei reng an ni a, an chungah thatna lantir a ngaihsak thei tur leh, i hmangaihna leh khawngaihna tawp chin neilo anga hmangaihna leh ngaihsakna ka lantir theih nan min tanpui ang che. Amen

Lieut. Colonel Celestin Ayabagabo and Colonel Bishow Samhika

DAY-8

NUN KAWNG

A way of life

Pathian hian a mite hi a mite kaltlang vekin a ngaihsak thin.

Tun tumah hian Bible a midangte chungga thatna lantirtute chungchang tarlan a ni a, phunnawi hauh lova kan mikhualte mai bakah hmehhriatlohte leh rawngbawltute chungga that chhuah tura insawmna a ni.

Ringtu kan nihna leh Krista taksa pu kan nihnaah hian, Amah anna leh Pathian hmangaihna chu mi dangte chungga thatna kan lantir hian tarlanin a lo awm a. Mi dangte tana inhawng tak leh mahni aia mi dangte dah chungnunna te, kan thil neih te inpeizawn tlanna khawvel hi han ngaihtuah ve mah teh.

Mi dangte laka thatna lantir hi hun engemaw chang chauha kan tihur ni lovin, nunphung pakhat a ni. Rom 12:9-21 ah hian Kristiante nun dan tur kan hmu a. Kan hun, sum leh pai, kan thiamna leh hmanraw tinreng te chu thatna luangliama kan senral erawh a ngai a ni. Inpumpek a ngai a, hmangaihna a taka lantirna a ni.

Pathian thu hian, Lal Isua leh a zirtirte leh zawlnei te kha in hrang hrangah an thleng a, hmangaihna leh duhsakna danglam tak nen an lo mikhual thin a ni tih min hrilh.

Mari leh Marthi ten inphal takin Isua an lo thleng a (Luka 10:38-42). Priskili leh Aquila ten Paula an lo dawngsawng bawh a (Tirhkohte 18:2,3). Abrahama leh Sari te chuan anmahni rawn tlawhtute chu tha takin an lo mikhual a (Genesis 18:1-8). Tabithi chuan thiltihin thatna a lantir bawh a (Tirhkohte 9:36) Tin, Boaza chu Ruthi lakah chuan a tha in a thilphal em em a (Ruthi 2:8-16), chutiangan mi tam tak an la awm bawh.

Bible hi ringtute nundan inngahna a ni a, Pathian thu a entawn tur tam tak atang hian, mi dangte chungga thatna lantir kan tih hian inpawm tawna te, intanpui tawn te, Pathian zahngaihna ang zela an mamawhna a tanpui te, in zahthiam te a huam tel vek a ni.

Thilphal taka mamawhtute hnen thleng thin, vantlanga tuartute leh raltlante tana rawngbawlsak thintu Salvation Army avang hian Pathian kan fak a ni. Chung zawng zawngah chuan Pathian ropui ber se, chawimawina leh fakna Pathian tana hlan zelin, chumi kaltlang chuan miten kan Lalpa leh Chhandamtu Isua Krista khawngaihna avanga min chhandamna chu an lo hriat theih nan. Chu chu kan tum ber tur a ni.

Mi dangte laka thatna lantir tur hian mimal kan pawimawh a, kan chenpuite lakah emaw kan hnathawhna te leh vantlangah kan lantir thei a, tin, kohhranah pawh kan tihmakmawh a ni. Chutih rualin mahni chauh chuan i bei lovang u. Hmangaihnaa mi dangte tana kan thinlung kan hawn mek lai hian Pathian, a fapa Isua Krista leh Thlarau Thianghlim thiltihtheihnaah chuan innghat ang u.

Mahni enletna :

Mi dangte laka thatna kan lanchhuahtir hian hmangaihna leh khawngaihna, thilphalna nena ti thin nge kan nih a chhungril a danglamna awm miah lova ti thin?

Tawngtaina :

Ka Pa duhtak, i zahngaihna leh hmangaihna avangin mi dangte chungga thatna lantir thei turin min pui la, i chatuan Lal ram luah tlak a nung turin, i Thlarau Thianghlim thiltihtheihnain min pui ang che.

Captain Dorothy Macwan